

Hillebrant Kneszke perner to Oschersleve, Hansz Schencke, Tidericus Peine und Gevert Schriver bekennen in diszem selben brepe, dat we alle desze vorgeschrebene dedinge hebben unsern vorgeschriebenen gnädigen herrn von Halberstadt hulpen dedingen und sie dar inne buten
 5 ober gewesen und betugen dat mit unser gnädigen hern ingesegel von Halberstadt, des we hir to bruken.

Und eck Heise Vuncke bekenne in diszem silben upenen briffe und lobe in guten truen, dat eck den vorsichtigen wisen luden burgermeistern rahtman burmester innungszmester haubtman, sine helper und alle
 10 borger gemeinde der stad Halberstadt alle disze vorbeschrebene stücke mit einander und ein iglich besunder stede vest und unverbrocken holden schal und will ane hilperede und geferde, und hebbe des min ingesegel witlick gehenget laten an dissen briff bi mines ergenanten gnädigen hern von Halberstadt ingesegel, des de vorgeschrebene stede
 15 rede und dedingszlüde to bekenntnisze diszer genannten stücke mede brucken.

Und we borgemester rahtman burmester innungsmeister hovetmann, sine helpere und borger gemeinde der stad Halberstadt bekennen in dissem silben openen breve und loven in guten truen, dat we dem er-
 20 samen heren Heisen Funcken und sinem gesinde alle disze vorgeschrebene stücke mit einander und einiglich besunder stede fast und unverbrochlich helden schullen und willen ane hulperede und gefehrde, und hebben des to tüge unses rades ingesegel witlick gehenget laten an disz breff bi des ehrwird. unses gnädigen hern von Halberst. inge-
 25 segel, des de rede der stede Quedlinb. und Aschersleve und dedingeszlude to beandtnusze diszer genannten stücke mede brucken, der gegeben ist in der stad Quedlinborg na Christi gebort vierteinhundert jar dar na in dem sesten jahr an sunte Gregorii tage des heiligen pabsts.
 Neuere Copie im Staats-Archiv zu Magdeburg in Cop. CIII.

30 **251.** *Geburtsbrief des Rathes der Stadt Braunschweig für Ludeke Hugholdes. 1407. Mai 13.*

We de rad der stad to Brunswich bekennen openbare in dussem breve vor alle den yennen de on seen horen ofte lezen unde sunder-
 35 liken vor den erzammen wyzen radismeistern unde ratmannen der stad to Quedlingeborch unsen frunden und vor den inningesmeistern unde den inningesbroderen ghemeynliken der koplude unde der wantsnydere dar sulves, dat vor uns ghewest syn Hinrik Otten unde Hinrik van Emen unse besethene warhafftigen borgere und ok andere unse borgere und oltsetene frome lude, eyn deil beseten bynnen unde ok buten unser
 40 stad, de hebben uns witlich gedan unde also wâr ghemaket, dat we on des wol geloven, dat Ludeke Hugholdes, anders geheten Ludeke Smet, dusse breffwyser, van erliken bedderven luden Hennige Hugholdes synem vadere unde Alheyde, des sulven Henniges eliken husfruwen